

武英殿聚珍版丛书

一

二

三

四

五

六

七

八

累代歷年二卷

司馬光撰卽所謂歷年圖也治平初所進自威烈王
至顯德本爲圖五卷歷代皆有論今本陳輝晦叔刻
於章貢爲方策以便觀覽而自漢高帝始

百官公卿表十五卷

司馬光撰其序曰朝廷所以鼓舞羣倫緝熙庶績者
曰官曰差遣曰職而已所謂官者乃古之爵也所謂
差遣者古之官也所謂職者古之加官也自建隆以
來文官知雜御史以上武官閣門使以上內臣押班

以上遷轉黜免存其實以先後相次爲表本入職官類以稽古錄序所謂建隆接乎熙寧臣又著之於百官表卽謂此書蓋與通鑑相爲表裏故著之於此案晁氏讀書志有一百四十二卷未詳

稽古錄二十卷

司馬光撰其表云由三晉開國迄於顯德之末造臣旣具之於歷年圖自六合爲宋接於熙寧之元臣又著之於百官表乃若威烈丁丑而上伏羲書契以來悉從論纂皆有依憑蓋元祐初所上也此書始刻於

越其後再刻於潭越本歷年圖諸論聚見第十六卷
蓋因圖之舊也潭本諸論各繫於國亡之時故第十
六卷惟存總論

通鑑釋文二十卷

案宋史藝文志作六卷

司諫司馬康公休撰溫公之子也

通鑑釋文三十卷

左宣義郎眉山史炤見可撰馮時行爲之序今攷之
公休之書大略同而加詳焉蓋因其舊而附益之者
也

通鑑前例一卷脩書帖一卷三十六條四圖共一卷

司馬光記集脩書凡例諸帖則與書局官屬劉恕范
祖禹往來書簡也其曾孫侍郎伋季思裒爲一編又
以前例分爲三十六條而攷其離合稽其授受推其
甲子括其卷帙列爲四圖

通鑑問疑一卷

高安劉義仲壯輿纂集其父道原與溫公往復相難
者亦附脩書帖後

通鑑外紀十卷目錄二卷

祕書丞高安劉恕道原撰司馬公脩歷代君臣事迹
辟恕爲屬嘗謂史記不及庖犧神農今歷代書不及
威烈之前欲爲前紀而本朝爲後紀將俟書成請於
公會道原病廢絕意後紀迺改前紀爲外紀云通鑑
書成恕已亡范淳父奏恕於此書用力最多援黃鑑
梅堯臣例官其子且以書賜其家道原父渙凝之家
廬山歐陽公所爲賦廬山高者也

疑年譜一卷年略譜一卷雜年號附

劉恕撰謂春秋起周平魯隱史記本紀自軒轅列傳

首伯夷年表起共和共和至魯隱其閒七十二年卽
與春秋相接矣先儒敘庖犧女媧下逮三代享國之
歲衆說不同懼後人以疑事爲信書穿鑿滋甚故周
厲王以前三千五百一十九年爲疑年譜而共和以
下至元祐壬申一千九百一十八年爲年略譜大略
不取正閏之說而從實紀之四夷及寇賊僭紀名號
附之於末

唐史論斷三卷

天章閣待制陽翟孫甫之翰撰甫以唐書煩冗遺略

多失體法乃脩爲唐史用編年體自康定元年逮嘉祐元年成七十五卷爲論九十二首甫沒朝廷取其書畱禁中其從子察錄以遺溫公而世亦罕見聞蜀有刻本偶未得之今惟諸論存焉

編年通載十五卷

集賢院學士建安章衡子平撰編歷代帝系年號始自唐虞迄於聖宋治平四年總三千四百年熙寧七年上之其族父棗質夫爲之序衡嘉祐二年進士首選也

唐鑑十二卷

案文獻通攷作二十卷

翰林學士成都范祖禹淳父撰祖禹與脩通鑑分主
唐史元祐初上此書攷其治亂興廢之由爲三百六
篇

紹運圖一卷

諸葛深通甫撰元祐中人未詳爵里其書頗行於世
俗

歷代帝王年運詮要十卷

左朝請大夫朱繪撰紹興五年序未詳何所入

歷代紀年十卷

濟北晁公邁伯咎撰詠之之子也嘗爲提舉常平使者其自爲序當紹興七年

讀史管見三十卷

禮部侍郎胡寅明仲撰以通鑑事備而義少故爲此書議論宏偉嚴正閒有感於時事其於熙豐以來接於紹興權姦之禍尤拳拳寓意焉晦翁綱目亦多取之

案朱子謂讀史管見乃致堂謫嶺表所作當時無一冊文字隨行只是記憶而議論儘有好处與此所云宏偉嚴正有感時事大指相同要之其書不外通鑑立義文獻通攷及宋史藝文志視解題分類較

多故不入編年
而入史評史鈔

皇王大紀八十卷

胡宏仁仲撰述三王五帝至周赧王前二卷自盤古
至帝嚳年不可攷信姑載其事而已自堯以後用皇
極經世歷起甲辰始著年紀博採經傳時有論說自
成一家之言然或取莊周寓言以爲實及敘遂古之
初終於無徵不信云爾

案趙希弁讀書附志云五峯先生所述皇帝王霸之事自

堯以上六闕逢無紀堯之初載迄于赧王乙巳二千
有三十年貫通經典採摭史傳又因事而爲之論所
以述去取之原釋疑似之惑者至矣朱彝尊作皇王
大紀跋謂譙周蘇轍撰古史胡衛撰通史緣起羅泌

撰路史不盡出于雅馴惟此書擇之精而語之詳云

經世紀年二卷

侍講廣漢張枋敬夫撰用皇極經世譜編有所發明則著之其言邵氏以數推知去外丙仲壬之年乃合於尙書成湯既沒太甲元年之說今案孔氏正義正謂劉歆班固不見古文謬從史記而章衡通載乃云以紀年推之外丙仲壬合於歲次尙書殘缺而正義之說誤蓋三代而上帝王歷年遠而難攷類如此劉道原所謂疑年者也然孟子亦有明文不得云史記

謬

通鑑論篤三卷

侍講廣漢張栻敬夫撰取通鑑中言論之精確者表而出之多或全篇少至一二語去取甚嚴可以見前輩讀書眼力之高

通鑑紀事本末四十二卷

工部侍郎袁樞機仲撰樞自太學官分教嚴陵爲此書楊誠齋爲之序

通鑑綱目五十九卷

侍講新安朱熹元晦撰始司馬公通鑑有目錄舉要其後胡給事安國康侯又脩爲舉要補遺朱晦翁因別爲義例表歲以首年因年以著統大書以提要而分注以備言自爲之序乾道壬辰也大書者爲綱分注者爲目綱如經目如傳此書嘗刻於溫陵別其綱謂之提要今板在監中廬陵所刊則綱目並列不復別也

國紀五十八卷

吏部侍郎睢陽徐度敦立撰度丞相處仁擇之之子

也其書詳略頗得中而不大行於世鄞學有魏邱舊書傳得之

續通鑑長編一百六十八卷

禮部侍郎睢山李燾仁父撰長編云者司馬公之爲通鑑也先命其屬爲叢目旣成乃脩長編然後刪之以爲成書唐長編六百卷今通鑑惟八十卷爾燾所上表自言未可謂之通鑑止可謂之長編故其書雖繁蕪而不嫌也其卷數雖如此而冊數至餘三百蓋逐卷又自分子卷或至十餘

續通鑑長編舉要六十八卷

李燾撰大略皆溫公舊規也

九朝通略一百六十八卷

起居郎建安熊克子復撰

中興小歷四十一卷

熊克撰克之爲書往往疏略多牴牾不稱良史

中興遺史六十卷

從義郎趙牲之撰慶元中上進其書大抵記軍中事
爲詳而朝政則甚略意必當時遊士往來邊陲出入